

四庫全書

經部

欽定四庫全書

經部  
周易衍義卷五

詳校官內閣學士臣尹壯圖

通政使司副使臣莫瞻菴覆勘

總校官知縣臣楊懋珩

校對官中書臣王家賓

謄錄監生臣胡念祖

欽定四庫全書

周易衍義卷五

元 胡震 撰



震下  
死上

隨元亨利貞无咎彖曰隨剛來而下柔動而說隨大亨  
貞无咎而天下隨時隨時之義大矣哉

元亨利貞乾坤四德人者天地之心賦予之際吾心  
自具一太極則四德自得於一已一物各具一太極  
則四德同得於萬物是元亨利貞四德人已同然之

天也羣心之隨而四德兼備不失其同然之天而足以保其隨羣心之隨而四德之一缺則失其同然之天不足以保其隨且自四德言之體元足以長人體亨足以合禮利物足以和義貞固足以幹事有此四德則足以協一天下之隨我而无異心處隨之盡善也類而推之己之德人君之從諫學者之從師事機之從宜皆要明此四德而後无咎昔鄭叔段得人心之隨矣然無德而得鄭衆適所以為咎齊桓常得人



心之隨矣然無德而得齊衆適所以為咎魯季氏得人心之隨矣然無德而得魯衆適所以為咎此人心之隨其依依之衆固可喜也盛德之愆其顯顯之望亦可畏也隨之為卦以卦變推之自困來則九來居初自噬嗑來則九來居五自未濟來則兼此二變皆以剛下柔以貴下賤之義此物之所以說隨也以卦德言震動於下兌說於上下動而上說或說而動或動而說此物之所以說隨也以序卦隨次於豫豫之為

義彼此和樂上下順動此卦序之所以為隨以二體  
言震男居內兌女居外少女從長男卦體之所以為  
隨以二象言雷震於澤中澤隨雷而動此卦象之所  
以為隨彖曰隨剛來而下柔動而說隨此以卦變卦  
德釋卦名也又曰大亨貞无咎而天下隨時隨時之  
義大矣哉此總其大要推其效驗以釋卦辭也程氏  
曰人君之從善臣下之奉命學者之從義臨事而從  
長皆隨也隨之道利在於正隨而不正則枉道以從

欲此乃隨之過也故卦辭曰元亨利貞无咎隨之所  
以能大亨者利於貞正而後咎可无也楊氏曰柳下  
惠聖之和伯夷聖之清可謂聖矣不若夫子聖之時  
以其泥於一而不知變也故失之隘失之不恭安得  
夫所謂大亨无咎之義聖人之所隨者時也時有消  
息盈虛不可以一槩論嫂溺援之以手固非禮也時  
之所在權亦隨之抱橋之信非無信也不知天時所  
在死將隨之善趨時者烏可執一歟聖人能隨時天

下之人隨聖人之時其為義也可謂大矣又曰非達權知變者不足與語隨時之義此卦其變為蠱卦其象雷在澤中隨之象也其占利於正則大亨也

象曰澤中有雷隨君子以嚮晦入宴息

雷發聲於震之春收聲於兌之秋由震而兌雷藏澤中與時休息為隨時之象曰出於東方之震入於西方之兌自震而兌自明向晦出於明者至晦而入也勞者宴作者息矣所以用隨也天地之隨為晝夜為

寒暑為古今君子之隨為動息為語默為行藏一晝  
夜之頃而動息隨之況於消息盈虛之大者乎向晦  
如日之沒光入宴息如雷之收聲程氏曰禮君子晝  
不居內夜不居外隨時之道也

初九官有渝貞吉出門交有功象曰官有渝從正吉也  
出門交有功不失也

官主守也既有所隨是其所主守有變易故曰官有  
渝貞吉所隨得正則吉也出門交有功出門者公也

常人之情愛之則見其是惡之則見其非妻孥之言  
雖失而多從所憎之言雖善而以為惡苟以親愛私  
暱而隨之豈合正理故出門而交則有功也夫初九  
之官有渝而貞吉者隨時變易而不失其正理事有  
萬端時有萬變或隨時而用經或隨時而用權或隨  
時而用寬或隨時而用猛或從上之所命或從下之  
所宜或從智者之特見或從愚者之一得所隨不同  
而皆正理之是從此貞吉也以此正道出而交際必

能以大道為公不昵親私不立町畦而可以成隨道之善象曰從正吉也又曰不失也因其從正之吉推其不失之功聖人之言功固以道為主非世俗功利之比也雖然明道不計功此聖賢之本旨也子路於管仲以功言管仲有九合之功子路無一日之烈然子路則曾西蹇然畏之管仲則曾西艷然鄙之何哉子路則範我馳驅而不獲者也管仲則為之詭遇而有獲者也凡事求可功求成取必於智謀功利之末

而不循天理之正非聖賢之道也是知隨之初九不  
必憂其出之无功當憂其渝之失正楊氏曰初九主  
一卦之動當事變之始其古之發大難當大變決大  
議者乎主是變也非有以仗天下之正開天下之大  
公未見其濟也故正則吉公則不失董公進發喪之  
議而名項為賊故王晁錯決削地之議而漢有其地  
故亂正則吉不正則凶也舍御事艱大之言而從十  
夫之謀故成東征之功用訓注小人之策而舍裴度



李德裕之賢故稔甘露之禍公則有功私則无功也  
出門而交震出而交兌此動而彼說隨斯有功而不  
失矣

六二係小子失丈夫象曰係小子弗兼與也

人之所隨得正則遠邪從非則失是與小人合則與  
君子離無兩從之理隨之六二柔而无立初陽在下  
小子也二則從而係於初五正應在上丈夫也二則  
遠而失之係非所當係失非所當失二則昏愚之甚

也二之係小子而失丈夫者必其親便佞而失正直  
親善柔而失信諒親便僻而失多聞陳相係許行則  
失陳良矣范增係項羽則失高帝矣李陵係匈奴則  
失武帝矣係邪則失正此理之必然也象曰弗兼與  
也所以戒人從正當專一也雖然天理人欲不容兩  
立為六二者能閑邪存誠遷善改過使一心之中塵  
淨鏡明則又何有小子之係丈夫之失哉楊氏曰以  
剛隨人者謂之隨以柔隨人者謂之係剛有以自立

而柔不足以自立故也六二陰不足於明又不足於斷不足於斷故不能違近而趨遠不足於明故兩者之間不知所擇焉

六三係大夫失小子隨有求得利居貞象曰係丈夫志舍下也

大夫九四也小子初九也六三與初九同體近係於九四下失於初九舍初從上是舍下隨上如昏之隨明事之從善上隨也得隨之宜也人之隨於上而上

與之凡所求皆可得也然又不可非理枉道以隨於  
上故云利居貞夫去邪從正固隨道之善而心術不  
正尤失之大者也孺悲欲見孔子似若得所從矣而  
夫子不之見何也謂其志之失正也滕更之從孟子  
似若得所從矣而孟子不之答何也謂其志之失正  
也是知隨之為義大矣哉附羣枉而失衆正固不可  
附正人而枉一己尤不可必外不失人內不失己方  
為隨道之善象曰志舍下也上隨九四之丈夫下舍

初九之小子所隨若是疑無餘說矣當隨之時有賢  
賢長長之志則雖愚必明雖柔必強此隨有求得也  
司馬溫公曰三无中正之德而不凶者所隨得其人  
也故君子謹志所從長者之慮則有全身之階小者  
之顛則有危亡之漸易曰係丈夫失小子

九四隨有獲貞凶有孚在道以明何咎象曰隨有獲其  
義凶也有孚在道明功也

得天下之心致天下之隨君道也九四以陽剛之才處

大臣之位逼君位之近而得人心之隨雖正亦凶況  
不正乎唯中有愛君之誠外盡為臣之道全之以明  
哲之節斯能保其功名而无危疑之凶夫莫難處者  
大臣之位不難處者亦大臣之位隨之九四謂之貞  
凶以其勢也謂之何咎以其理也所謂隨有獲貞凶  
者以人君則惟己之隨而有擅執國柄之嫌以民庶  
則惟己之從而有自作威福之議望尊任重其位若  
難處矣然使誠信孚而信道明則可以正道而致其

君於安富尊榮可以此道而致其民於平定安泰可  
以使諸侯尊天子可以使一世由綱常无逼上之嫌  
无專國之過无玩威權之失上安下順其位有不難  
處者矣自夫人不明此義然後竊君權之罪形祿去  
公室之釁起使斯道洞明於胸中則雖處盛世其夔  
夔齋慄固不至若是也象曰其義凶也謂其勢之盛  
有凶之義也又明功也謂其理之正有明哲之功也  
警之以貞凶誨之以何咎聖人之立教明矣程氏曰

位極而无逼上之嫌勢重而无專強之過非聖人大  
賢則不能伊尹周公孔明是也其次如唐郭子儀威  
震主而主不疑亦由中有誠信而處无甚失也

九五孚于嘉吉象曰孚于嘉吉位正中也

嘉善也嘉謀嘉猷嘉德嘉績皆善也九五以陽剛居  
中得正為悅隨之主應六二正中之臣此聖君至誠  
樂從天下之善吉孰大焉隨以得中為善隨道之吉  
唯在從善從善之誠既至則從善之福亦至世之人



君如其善而莫之違則為納忠為容諫為尊德樂道  
以之興邦可也夫如是何惡於隨如其不善而莫之  
違則為苟從為輕信為無定見以之喪邦可也夫如  
是何取於隨昔者周王悞信褒姒而致狄戎之禍二  
世悞信趙高而致咸陽之變漢武悞信王恢而致馬  
邑之敗所隨不善凶固如此九五之孚於嘉吉必其  
唯臣下之嘉謀嘉猷嘉德嘉績嘉師之是信是從所  
以吉也其堯之舍己從人高祖之從諫如流太宗之

道人使諫歟象曰位正中也謂其居中正之位備中正之德而下應乎六二中正之臣其所孚者固有中正之美德矣

上六拘係之乃從維之王用亨于西山象曰拘係之上窮也

上六以柔順之德居說隨之極得民心之隨固結而不可解無以為喻若有拘而係之者喻之不足又若有繫之維之者是雖逃之有不脫辭之有不聽況復

可得間而離之乎昔者太王王季文王之亨於西山  
得人心之從而不可解也西山岐山也謂之拘係見  
人心之始不去也謂之維之見人心之終大同也周  
之興王業自其由幽而遷於西山有以開王道之基  
自其遷豐而出於西山有以衍王道之傳是非周家  
強人心之我從也理義滲漉乎人心德澤洋溢乎四  
境人心自不能不隨也周家非能計王道之興也天  
下於此乎歸往忠良於此乎戴翼王道自不容不興

也自時厥後武王纘大王王季文王之緒以三千臣  
則同心以八百國則自會民心之隨與西山之隨無  
異向故其壹戎衣而天下定尊為天子富有四海宗  
廟享之子孫保之則王道之興肇端於西山而成功  
於鎬京也象曰上窮也謂其居一卦之極而得隨道  
之極致也文公曰當隨之世陰柔不能自立必附陽  
而後能有立故三陰爻皆言係取依依於人而能立  
之象



巽下  
艮上

蠱元亨利涉大川先甲三日後甲三日彖曰蠱剛上而柔下巽而止蠱蠱元亨而天下治也利涉大川往有事也先甲三日後甲三日終則有始天行也

左氏傳曰風落山女惑男以長女下於少男亂其情也風遇山而回物皆撓亂是為有事之象故曰蠱者事也既蠱而治之亦事也自古治必因亂亂必開治理自然也蠱之所以元亨者以能飭之耳飭之則弊

革事理而可致大亨也事之大者濟時之艱難險阻如涉大川之為利又當知先甲後甲之義以新天下而垂後世也夫欲通治道者必先於濟世變欲濟世變者必先於法天道天下否泰之相因未有傾否而不泰者天下剝復之相仍未有終剝而不復者蠱之所謂元亨者以蠱亂之際不能无危天下之溺自我援之變故之衝自我救之羣言之風波人情之險巇自我平之解中流亡楫之變平生民險巇之危則治

道始得而亨通然推行於事為之粗未嘗不盡乎天地之妙先甲三日而謀之所以法天道之卒而新天下之治究其弊之所以然致其振作整新之功後甲三日而謀之所以法天道之丁而致其丁寧審覆之意患有未盡除利有未盡興弊既去而復生又慮其所將然致丁寧告戒而思備之之方先甲後甲所以法天道者又所以為濟人事之本歟彖曰蠱剛上而柔下巽而止蠱剛上而不降柔下而不升則上下之情

兩隔而不通異順而不健艮止而不行則上下之材  
兩弱而不立天下之事得不壞乎此卦之所以為蠱  
又曰蠱元亨而天下治也利涉大川往有事也易窮  
則變變則通通則久是以事之壞者又當振而起之  
往有所事見險而動動則濟險矣所以能致治也又  
曰先甲三日後甲三日終則有始天行也有始則必  
有終既終則必有始天之道也聖人知終始之道故  
能原始而究其所以然要終而備其所將然先甲三



日後甲三日而為之慮所以能飭蠱而有元亨之治也蓋洪濟艱難力扶憂危此飭蠱之始事先天以謹其始後天以謹其終此飭蠱之中事四海會通羣生底乂此飭蠱之終事楊氏曰宣王當厲王无紀綱文物之後宣王振而起之復文武之境土復會諸侯於東都而其所以振而起之者以北伐玁狁南征蠻荆涉大川以此而已朱氏曰漢嘗削諸侯之地矣唐嘗討弑君之賊矣令下而兵起言出而禍隨昧治蠱先

甲後甲之義也此卦變為隨卦其象風回山下蠱壞萬物有蠱之象其占往而有事則元亨也

象曰山下有風蠱君子以振民育德

山之為物以止靜為體風之為物以散動為用此有事生於无事之地然也故為蠱之象君子以謂天下大事常伏於无事之際也故平時暇日其於民也務振作其氣使之力所謂相養之道而无廢惰自安之人其在已務涵養其德使之日新又新而无逸豫自

止之意則君子之所謂事无有外於此二者中庸成  
物智也成已仁也合内外之道也故時措之宜也育  
德者振民之本

初六幹父之蠱有子考无咎厲終吉象曰幹父之蠱意  
承考也

蠱者事也諸爻皆取幹事為義蠱非創始之事蓋嘗  
作之而弊壞者敝而改為則治矣初六一爻居卦之  
首前无先之者父没子繼之象故云考承父已基之

事能幹父之蠱則有子矣有子則考乃无咎若武王  
言惟朕文考無罪同意然初六在下无應巽體柔弱  
子幹父事必克濟則不累其父故能厲則可以終吉  
夫天倫之重莫重於父子父之與子本一體而分喘  
息者也已之德善即親之德善已之功烈即父之功  
烈子幹父蠱必有以振其父之所未舉者必有以理  
其父之所未修者必有以飭其壞之未去者然後能  
不累其親然保其基業守其宗廟永有名譽豈易言

哉危懼不忘尚可克終慢忽一萌凶即隨之要必如臨  
深淵如履薄冰道而不徑舟而不游常懷惕厲可以  
終吉也象曰意承考也謂幹蠱之意在於承其父事  
是道也知傷其身是傷其親之旨者可與語此知夙  
興夜寐无忝爾所生之旨者可與語此知洞洞屬屬  
如弗勝如將失之意者可與語此彼有不知此身為  
親之枝而不敬者是不孝也

九二幹母之蠱不可貞象曰幹母之蠱得中道也

九二以陽剛之臣輔柔弱之君為六五所應是以陽  
剛之才在下而幹夫在上陰柔之事故取子幹母蠱  
為義子於母以柔則合以剛則睽父道配天天主乎  
剛必剛健中正而後合其德母道配地地主乎柔必柔順  
含洪然後合其德今子之幹母蠱者內政之未修者  
修之內事之未飭者飭之母儀之有條緒者則輔佐  
之冢婦介婦之有職任者則分畫之從容和緩將順  
其美匡救其失使之身正事治足矣曰不可貞不可

貞固盡其剛直之道若伸己剛直之道遽然矯拂則傷恩所害大矣又安能入母之心或曰預外政者非婦人之事六五母道而止乎外九二子道而巽乎內正以母干外政而有蠱壞事為子者當巽順將承柔聲微諫使之身正事治則為孝也又曰子事父母非有二道聖人於初六則垂惕厲之訓於九二則垂不可貞之戒何哉曰初以柔而任父之事則當自戒其柔而不勝二以剛而任母之事則當自警其剛之過

尤各舉其偏者而言也合而言之行父母之遺體者均之不可无危懼之心任父母之所事者均之為不可有堅正之過象曰得中道也謂不固執其剛而行之以巽剛柔相濟得中道也是道也非特子之於母為然以陽剛之臣輔柔弱之君亦類也孟子事齊王齊王之弊政固多端其君好樂輒不能正之以韶護之樂故以與民同樂之事勉之其君好色輒不能亟正之以不邇聲色之事故誘之以太王之事其君好貨



軻不能亟正之以不殖貨利之事故誘之以公劉之事是以巽而入乃聖賢之所常行而固守以盡其剛直亦未必能入之也雖然事親主恩事君主義又不可以一端求也

九三幹父之蠱小有悔无大咎象曰幹父之蠱終无咎也任父之事而得失之相參九三是也夫行无專制事无由已有隱无犯子道之善也九三幹父蠱而有悔者必過剛失中改其親之弊政或不能无更革之迹

修其親之廢緒或不能无作為之過故有小小之悔  
然曰无咎者巽而得正能誨而行不終於專制所以  
无咎雖然天下之理介於毫釐之間察之不精而害  
道者不少父有爭子則不陷於不義而申生之辯適  
以陷父則剛亦患於過中也子從父令不足為孝而  
舜之克諧未嘗以順廢人之大倫則巽尤不可以失  
正也夫剛而中巽而正子道之備也何至如九三是  
非之相雜哉童溪曰九三剛過父之爭子也不從其

令以爭此小有悔也然其爭也所以免父於不義謂之非孝可乎此君子之所予故小象曰終无咎也

六四裕父之蠱往見吝象曰裕父之蠱往未得也

當頽敗而振起之幹父之蠱也當頽敗而委竄之裕父之蠱也六四以至柔之才爻位俱柔體艮之止止者怠柔者懦是无幹蠱之才安往而不吝父有作室曾不知勤其肯堂肯構之事厥父苗曾不知勤其肯播肯穫之事厥父翼曾不知勤其弗棄其基業之事精

銳銷於退縮振作壞於廢弛寬裕偷安以治其蠱不知興智補弊之為力適所以益增其蠱也是以往而吝持是以往吝道也象曰往未得也謂其寬弛其親之弊事故有所往而元所得也嗚呼伯鯨有敗斃之事而禹能克勤修之故能致鯨之配天蔡叔有惑亂之事而蔡仲以能慎理之故能使蔡之傳世非惟子道惟臣亦然率作興事屢省乃成臯陶所以事虞舜王事多艱不遑寧居南仲所以事文王不留不處三

事就緒休父所以事宣王使數君子處大臣之位而  
以寬緩處之其悔吝有不可勝言者矣此子勤父事  
則為孝臣勤君事則為忠也或曰益長裕而不設則  
為善此之裕則為吝何也曰益之裕寬洪廣大而无  
迫切之意此之裕寬緩廢弛而无嚴密之規故不同  
也程氏曰四所處得正故為寬裕以處其父之事僅  
能循常自守而已若往幹過常之事則不勝而見吝  
以柔順而无應安能往濟楊氏曰初六九二九三幹

蠱之後事之壞者亦少飭矣曰裕父之蠱勸以寬也  
曰往見吝往未得戒其迫也此惠帝欲有為而曹參  
守蕭何之規而无為以成清靜寧一之治六四是也  
六五幹父之蠱用譽象曰幹父用譽承以德也

創業開基之事非剛明之君不能繼世之君雖柔弱  
之資苟能用賢則可以為善繼而成令譽也蠱之卦  
初六之小臣倡其幹九二之大臣柄其幹九三之近  
臣勇於幹九四之大臣致於裕六五以柔德履尊位

繼父而成幹蠱之治下應九二陽剛之臣是能用其  
譽髦之臣承以衆賢之德正禮樂明紀綱修制度新  
士習宣教化觀前人之耿光揚繼世之大烈幹蠱而  
用譽是為善而貽其親之令名也太甲成王皆以臣  
而用譽者也象曰承以德也謂其有柔中之德而繼  
成其親是以用致令譽也昔武王致文王之治大勲  
未集天下猶蠱亂也朋家作仇民志猶蠱惑也武王  
於此繼志述事幹文王欲治之蠱成周家无窮之休

故夫子稱其達孝又曰一戎衣而天下定身不失天下之令名則武王於幹父用譽之道其善矣乎

上九不事王侯高尚其事象曰不事王侯志可則也

有事之初退避於无事者非臣道之正无事之後必欲其有事者亦非臣道之正蠱至上則是蠱壞之事皆為初六九二九三六五幹濟之矣幹至五而用譽无復蠱之可幹況上九陽剛居上下无應與又居艮體在事之外此賢人君子高潔自守不累於世務者



也當此時而依阿取寵枉尺直尋无高尚之節則有  
失已之恥矣小象曰志可則也謂其處无位之地无  
任事之責自守如此所存之志可法則也雖然士之  
自高尚亦非一道有懷抱道德不遇於時而高潔自守  
者有知止知足退而自保者有量能度分安而不求  
人知者有靖介自守不屑天下之事獨潔其身者所  
處雖有大小得失之殊皆自高尚其事者也嘗觀之  
泄柳閉門不内于木踰垣而避其失也傷於迫切而

不洪樂正之徒哺啜張儀之為妾婦其失也淪於卑  
賤而可恥得失雖有小大之殊然隘與不恭君子不  
由也唯聖人得禮義之中正可仕則仕可止則止可  
久則久可速則速矣未嘗局於一偏也韓文公曰使  
蠱之上九居无位之地而致匪躬之節蹇之六二在  
王臣之位而高不事之心則冒進之患生曠官之刺  
興志不可則而无不終无也論至於此則知不事王  
侯高尚其事唯蠱之上九則可



兌下  
坤上

臨元亨利貞至於八月有凶彖曰臨剛浸而長說而順  
剛中而應大亨以正天之道也至於八月有凶消不久  
也

喜陽剛之長幸君子之得時憂陰柔之長慮君子之  
忘戒陽為君子陰為小人臨者二陽方長之卦二陽  
浸長而徧臨四陰此吾道之元亨而利於貞正之會  
也然自古天下未有治而不亂陽始於復而臨次之

陰始於姤而遯次之自復而臨三陽為泰四陽為大壯五陽為夬六陽為乾乾之後一陽又生而為姤二陰為遯由復至遯恰八月也二陽長而為臨二陰長而為遯聖人體天以臨民治不忘亂安不忘危存不忘亡當臨而戒遯故曰至於八月有凶陰道長而陽道消君子當知所戒也夫天下未嘗无君子亦未嘗无小人此盛則彼衰彼長則此消必然之理也泛觀古今之變元帝之世領尚書者望之周堪居拾遺者

更生金敞四賢並進天子嚮納亦可以言剛長矣未  
幾而入恭顯之網靈帝之世陳蕃竇武同獎王室膺  
密勲瑜共參政事名賢協心士流望治亦可謂剛長  
矣未幾而飲曹王之毒神龍之際以張易之張昌宗  
則誅戮矣以張柬之崔元暉則鳳閣鸞臺矣然二張  
之肉未寒而三思之焰已熾開元之際以蕭至忠岑  
義則染刃矣以張九齡元之則拾遺紫薇矣岑蕭之  
骨未朽而林甫之齒已利是則以柔消剛小人固有

餘罪盛而忘衰治而忘亂在君子亦不為无過也彖  
曰臨剛浸而長所以為臨也曰說而順剛中而應大  
亨以正天之道也內說外順不事矯亢足以為大亨  
以正之本而无所忤剛中應君不事諂佞足以為大  
亨以正之本而无所屈以說順剛中而得元亨利貞  
純乎天理者也又曰至於八月有凶消不久也此言  
八月之近陽不久而為陰所消不可不備也聖人之  
於君子其許之也至其警之也深楊氏曰浸而長則

莫之忌說而進則莫之拒中而和則莫違能此三者則大亨矣然必正而後可是三者有一不正浸則姤說則諂和則流蓋正者天之道也程氏曰剛正和順合天之道以此臨人臨天下莫不大亨而得正也在卦取自上臨下臨民為義此卦其變為遯卦其象地臨於澤以上臨下之象其占大亨而利於正也

象曰澤上有地臨君子以教思无窮容保民无疆

澤上有地地臨於澤是為以上臨下之義以剛臨柔

之象君子觀臨下之象體澤之漸濡有與而无竭則  
教思无窮宣明道化使小人皆為君子之歸體坤之  
博厚有容而不隔則容保民无疆撫綏海宇使小人  
終不為生民之害教化之澤悠久无斁容保之功廣  
大无間人君以此為臨民之道人臣以此而輔臨民  
之政又何有乎八月之凶耶教之而倫理明保之而  
生養遂所以用臨也

初九咸臨貞吉象曰咸臨貞吉志行正也



天下无兩立之理以忠臨佞則忠者吉以直臨邪則  
直者吉以善臨不善則善者吉臨之初九以陽剛之  
長而咸臨四陰之象非曰以知術而臨之非曰以黨  
與而臨之非曰以權勢而臨之以德則剛以位則正  
是初九臨四陰臨之以道德之正臨之以仁義之正  
臨之以議論之正故得吉也象曰志行正也志在於  
行其貞正之道也程氏曰咸感也六四居近君之位  
初得正位與四相感而應是以正道為當位者所信

任獲乎上有道而得行其正是以吉也

九二咸臨吉无不利象曰咸臨吉未順命也

九二以九言之則剛以二言之則中有剛中之德以咸臨四陰宜其以已觀之則无不利以事推之則无所不利也夫九剛也剛則不屈於人欲不牽於邪念不至於僉壬其至誠无息其浩然無餒大勇无挫以此而咸臨羣陰自吉无不利二中位也中則无太過无不及其說順也无諂佞其介特也无矯亢清不流

於隘和不流於不恭以此而咸臨羣陰自吉无不利  
小象曰未順命也九二以剛中應君所順者在道未  
必順君之命而吉利也雖然順命之說有二人臣之  
事君當匡救其惡之時則順命之說為非當將順其  
美之時則順命之說為是君命未當固不必其皆順  
君命既當則惟恐其不順爾程氏曰二方陽長而漸  
盛感動於六五中順之主其交之親故見信任而得  
行其志所臨吉而无不利也以剛德之長而又得中

至誠相感非由順上之命也

六三甘臨无攸利既憂之无咎象曰甘臨位不當也既憂之咎不長也

六三居下卦之上陰柔說體不中不正又乘二陽之進故不安而以甘說臨人失德之甚无所利也既知危懼而憂之持謙守正至誠自處則无咎也夫辱已佞人固小人之詖行遷善改過乃君子之盛心宣孟為仁為義而終不能全一身之節裴度有功有德而

終不能托六尺之孤此靡不有初鮮克有終吾未嘗  
不惜其不終為君子也夷之從墨子而從受孟子之  
責陳平諛呂后而終能服王陵之義此不克厥初圖  
惟厥終吾未嘗不嘉其不終為小人也六三所謂甘  
臨者其便佞其善柔其便僻違道干譽脂韋嫵媚以  
甘說臨人祇見其反道敗德傷風壞教何所往而利  
然天下之生同一元氣降衷之初本无君子小人之  
分謂其小人者特其稟氣之偏為習俗之誘爾使六

三知甘言之為非能憂其不中而思其中憂其不正而思其正則其天者全而君子之道在是矣何咎之有象曰位不當也謂其陰柔而不中正所以有甘說之愆曰咎不長也謂其知甘臨之失而憂懼自懲其過咎之所以不長也臨卦剛長泰來之時豈容小人以邪說誣民充塞仁義也六三知時識變懼而憂之則反善之心生可以補過矣此一爻聖人開小人以遷善之門自新之路也

六四至臨无咎象曰至臨无咎位當也

六四居近君之位切比下體是與下至相親臨者也  
臨道尚近故以比為至四居正位下應初九陽剛之  
賢有委已用人之美无妬賢嫉能之心以是而臨下  
臨之至也所以无咎夫以四之所處而言柔而得正  
无邪柔之失无側媚之態无偏黨之累正已如此此  
至臨之所以无咎以四之所應而言柔而應剛人之  
有技若已有之人之彥聖寔能容之以保我子孫黎

民親賢如此此至臨之所以无咎象曰位當也聖人  
贊以位之當非竊位蔽賢者比矣雖然正已而後可  
以親賢彌子未嘗不欲向孔子而孔子不主之為其  
不正也陽貨未嘗不欲任孔子而孔子不從之為其  
不正也在已能賢然後賢者以類從天下未有小人  
而能任君子者也朱氏曰臨以大臨小四居下之上  
為五所任而比於下得君而近民者也臨道尚近臨  
之至也



六五知臨大君之宜吉象曰大君之宜行中之謂也  
充明德之全體則能全君道之大用臨之六五以柔  
中之君不自任其聰明不事機巧不銜知術與九二  
剛中之臣相應而推誠以任之任賢以臨下此乃大  
君之知也此乃大君之宜也吉可知矣昔者堯之知  
曰如神矣舜之知曰大知矣而堯舜不自用其知考  
之當世司厯象者有人平水土者有人典禮樂者有  
人明刑弼教者有人堯舜之為君也行其所無事已

況臨為君子道長之卦而六五又以柔中而應剛中之臣則其所以君臨天下者必合天下之聰以為聰合天下之明以為明故曰知者无不知也急親賢之為務堯舜之知急親賢也若夫指鹿為馬其知為何如此又君之蔽於明也象曰行中之謂也唯其能知此中理是以能行此中理也此其所以為大君之宜也上六敦臨吉无咎象曰敦臨之吉志在内也

惟民生厚因物有遷此先民之格言所謂敦厚乃天

理之本然人心之同然有時而流於薄非性之罪也  
人惟性其性則深厚之德著焉是以有臨則能處順  
持正能應剛重道未有不善終者人惟不知性其性  
則浮薄之行形焉是以有臨則為輕已傲物為忌賢  
嫉能未有能善終者也上六之敦臨者處坤厚之體  
居无位之地柔順得正能以厚德樂善之心從二陽  
之君子以敦厚而臨禮義不愆福慶咸萃內而視一  
身外而福天下遠而弭八月之凶皆自此厚德而基

之爾象曰志在內也上六敦厚而從二陽之君子吉  
且无咎宜也况上六與六三為應使上六不敦厚則  
為六三甘說之小人誘引之矣又何吉焉楊氏曰臨  
之世二陽方長而六五之君任之六四之近臣應之  
上六无位之賢者亦厚之君子之逢斯世何其幸歟



坤下  
巽上

觀盥而不薦有孚顒若彖曰大觀在上順而巽中正以  
觀天下觀盥而不薦有孚顒若下觀而化也觀天之神  
道而四時不忒聖人以神道設教而天下服矣

宗廟之禮所以致誠敬也散齋七日致齋三日祭之  
初迎尸入廟天子洗手而後酌酒洗謂之盥酌酒獻  
尸尸得之灌地而祭謂之裸裸之後三獻而薦腥五  
獻而薦熟謂之薦故獻之屬莫重於裸而盥者未裸

之時精神專一誠意未散不言之信發而為敬順之貌者顯顯如也故下觀而化金聲而玉振莫不有敬順之心及其薦獻禮大繁縟人心散而精一不若始盥之時矣觀之一字視於物則為觀為觀於下則為觀如樓觀謂之觀者為觀於下也君子居上為天下之表儀必極其莊敬則下民觀仰而化故為天下之觀當如宗廟之際祭而始盥之時不可如既薦之後則下民盡其至誠顯然瞻仰之矣觀之為義聖人以

德望而示人者也然聖人雖有以示人而所以示民者不在於粗迹猶祭祀之際見其盥潔之誠不見其薦獻之物正所謂上以神道設教則下以誠心從教也夫天生烝民有物有則民之秉彝好是懿德上天之載元聲元臭聲色化民是為末務聖人以神道設教想其未嘗示慶賞以為觀也不賞而民自勸未嘗示威怒以為觀不怒而民威於鈇鉞未嘗示足恭以為觀篤恭而天下平如祭祀之際有誠敬之可仰无

物象之可見未施信而民信未施敬而民敬惟見天下遷善遠罪不知王化之所由出作人息不知帝力之有在有孚則人心咸信也有孚顯若則人心信而仰之也以盟而不薦言則其道窈然而莫測以有孚顯若言則其道翕然而胥信此斯道之神不見而章不動而變元為而成鼓之舞之自得於神交精契之餘而莫知其妙也象曰大觀在上順而巽中正以觀天下此以卦體卦德釋卦名二陽在上而下為四陰



之所觀九五居中履正以陽剛中正之德為下所觀其德甚大故曰大觀在上順而巽合二體以取義中正以觀天下此又信九五之德足以觀示天下而然也又曰觀盥而不薦有孚顒若下觀而化也此觀以訓義釋卦辭也又曰觀天之神道而四時不忒聖人以神道設教而天下服矣此所以發明卦辭也天下之所以觀者聖人也聖人所觀者天也聖人何取於天哉以其不言之教見於四時之自行而无有差忒

此所謂神道也神即誠也體於心而謂之誠妙於物則謂之神一物也聖人設教於人舍天何觀焉其能使天下觀而化則不言之教寓於始盟之時此所謂神道也中庸曰至誠如神又曰誠則形形則著著則明明則動動則變變則化唯天下至誠為能化也此卦其變為大壯卦其象風行地上為觀之象其占孚信在中則顯然可仰而言也

象曰風行地上觀先王以省方觀民設教

風行地上周及庶物為由歷周覽之相先王體之隨  
其地觀其俗因其情設其教此省方之本意也虞周  
時巡狩是也省方所以輯五方所有之性觀民所以  
觀百里不同之風奢則約之以禮省方觀民也設教  
為民觀也夫觀者四陰寢盛之卦是小人道長之卦  
也聖人變陰陽消長之例取以上示下以下觀上之  
義此固欲以神道立教潛消默制使盛長之陰柔皆  
化而為陽剛君子而不自知也不然四陰盛剥道教

愈微而小人愈彰矣此又益信易道之扶陽而抑陰也洪氏曰所以教者不過五教之目而五方之民異俗則其設教不得而槩施之修其教不易其俗所以入之易也

初六童觀小人无咎君子吝象曰初六童觀小人道也童者蒙穉之未發如冲人之未有知也九五以陽剛中正大觀在上近之則見其道德之光而初六陰柔小人與五相遠蒙而无見如童穉然所見昏淺不能

識君子之大道在凡民為可恕不足咎也若君子而如是則可鄙吝矣夫小人之不能遠見不足責君子之不能遠見深可責小人而觀童以其親耒耜而耳不聞環珮之聲事耕稼而目不覩恭遜之容居山林而身不習朝廷之儀其出處不足關世道之盛衰其得失不足係名教之重輕雖觀如童固不足為有尤也君子人歟社稷於已乎倚仗民望於已乎具瞻世教於已乎權輿以此身膺天下之安危運風俗之樞

機所觀乃如童稚然不亦大可鄙乎嗚呼學稼之事  
老農專之无害也以樊遲而祇欲親此職則可吝圖  
利之志以巨賈為之未害也以子叔疑而亦存其心  
則可吝以順為正以妾婦為之未為過以公孫衍張  
儀亦為此態則可吝初六之童觀不責之草茅蕪蕪  
之賤人而責之朝著縉紳之清流蓋小人无學未足  
憂也君子无學深可憂也象曰小人道也謂所觀淺  
近有如童蒙此小人之事非君子之道也雖然曾參

不能見襲裘之禮孟子不及見班爵之制則君子固或不可小知愚可為明柔可為強小人亦不可自畫互鄉之童尚可以進潔已之功而長沮桀溺之避世則局於蒙稚之見而不知自勉者也由童蒙之近觀進而至於達人大觀小人未嘗不可進於君子也卦以觀示為義據九五為主也又以觀瞻為義皆觀乎九五也

六二闕觀利女貞象曰闕觀女貞亦可醜也

蒙而无見曰童有見而小曰闕有見固愈於无見也  
有見而小其愈於无見幾何六二與五為正應然四  
陰同類柔弱昏暗安能觀九五之大觀不過見正道  
之一節一目不能見陽剛中正之全體也如以管窺  
天以蠡測海不過小有所見而已誠齋所謂御事以  
東征為艱子路以正名為迂斯見也女則貞在士則  
醜夫君子之進德必洞察元亨利貞之道仁義禮智  
之綱謀王斷國之論萬世典禮之實可也若女子之



貞不過窺見婦德婦言婦容婦功之一節而已象曰  
亦可醜也窺觀之見是特女子之利在丈夫言之則  
為醜昔者褒姒哲矣而生厲階武后才智矣而禍唐  
室是女子之利其巧慧周觀而不正曾不若蠢愚龐  
厚而守正此六二之闕觀聖人曰女子貞亦予其利  
也昔者子貢遊夫子之門猶不能无貨殖之心无多  
言之累聞一知十自愧於回子貢之觀夫子其始也  
殆不能見其全及其聞一貫之旨悟性與天道之說

然後知足以知聖人非復前日以言語闕夫子者不  
然是亦闕觀之可醜也程氏曰二既不能明見九五  
之道能如女子之順從闕覘其彷彿則不失中正乃  
為利也雖能順從乃同女子之貞亦可醜也二陰柔  
居內而觀外雖與五為應前為三四所蔽所見不明  
如門中視物闕觀之象

六三觀我生進退象曰觀我生進退未失道也

生出也謂才德之出於己者六三柔居剛其位非正

然處上下之際上近觀光之賢則疑可進矣下比闚  
觀之儔則又疑其可退然六三處順之極能以至順  
之性順時以進退者也其曰觀我生而進必曰吾學  
可成乎吾業可精乎吾道果足以致君澤民乎如是  
而進必不觸於藩不入於坎窞之凶矣其進也何失  
道之有其曰觀我生而退必曰吾學問有未至乎吾  
德業有未進修乎吾果无偷生全軀之悔潔身亂倫  
之過乎如是而退必不困於石不據於蒺藜其退也

何失道之有昔伊尹拜成湯再三之聘則幡然有為  
不苟退也漆雕開聞夫子使仕之言則退然自遜不  
苟進也是二子者觀我生必有道矣六三居下之上  
可進可退不觀九五而觀已所行之通塞以為進退  
未失道也楊氏曰六三九五皆曰觀我生六三察已  
以從人九五察人以修己

六四觀國之光利用賓于王象曰觀國之光尚賓也

觀莫明於近九五以陽剛中正之德居尊位是聖賢

之君也六四切近其觀國之光想九五大觀在上如  
日在天明照四海輝耀八紘觀其人材則鬱然而相  
輝觀其禮樂則煥然而有文觀其刑政則燦然而有條  
此時此際君道開明之時小人燭熄之日也六四既  
觀人君之德國家之治光華盛美如此孰不願進於  
朝輔戴之以康濟天下也古有賢德之人則人君賓  
禮之宜也象曰尚賓也尚謂志尚謂其既見君之明  
為邦家之光而志意向慕賓於王朝也雖然君子之

尚賓豈志於苟祿哉有光冒海隅之君則願為邦家  
之禹稷有光於四方之王則願為邦家之周召君子  
之仕也行其道而已矣楊氏曰六四俟明德之君而  
後進故其君尊尚之而賓其人下不輕一身則不輕  
一士矣箕子近天子觀國也王訪於箕子尚賓也白  
雲曰君之光莫光於有德國之光莫光於用賢六三  
遠君方且自觀其身而圖進退六四則近君之位已  
進而觀國者也國有光焉非利用賓之時乎蓋无進

退之疑也或謂賓有不純臣之義夫忠臣嘉賓賢者德之稱也

九五觀我生君子无咎象曰觀我生觀民也

九五居至尊之位係天下之望教化之興廢於我乎出風俗之善惡於我乎出內外之理亂於我乎出要必以仁存心以禮存心孫以出之信以成之自合乎君子之德然後无愧於觀然後可以表正天下而无咎此大學之新民必在於明德中庸之成物必先貴

於成已也象曰觀民也謂人君之觀我生不但觀已之所行觀民德之善惡亦所以觀已也觀我所自出者道雖本諸身得失則驗之民而後見楊氏曰民之善惡生於君君之善惡形於民九五欲觀已之生觀於民之君子小人而已故觀堯舜者以比屋觀文武者以羣黎周誥所謂人无於水鑒當於民鑒中庸曰君子之道本諸身徵諸庶民即此意也


上九觀其生君子无咎象曰觀其生志未平也



其生謂言行事為之見於外者觀我生自觀其道者也觀其生為所觀者也上九以陽剛之德居无位之地雖不當位是賢人君子不在於位而道德為天下所觀仰者也然以人觀其德用為儀法故當自慎省觀其所生常不失於君子則人不失所望而化之矣夫名望有時而幸得實德每患於不稱人以大匠名衆必觀其度材有離婁之明則无愧无離婁之明則方員不成咎將若之何人以樂工名衆必觀其正音

有師曠之聰則无愧无師曠之聰則律呂不諧咎將  
若之何揚雄負天下之望而不免大節之玷安石負  
天下之用而不副蒼生之期盛名之下其實難副而  
民具爾瞻亦非薄德者所能當也此上九為天下之  
所觀要必有成德而後可象曰志未平也謂其雖不  
得位而為人所觀仰未可安寧而忘戒懼也昔夫子  
立教洙泗之上其道德足以聳三千之觀聽係萬世  
之重望遊其門者喻之宮牆以觀其高喻之江海以

觀其深喻之日月以觀其明夫子猶曰君子之道四  
立未能一焉君子道者三我無能焉以夫子之仁聖  
而所憂猶若是蓋惟恐其不盡君子之道而有負於  
天下之觀也吁此其志之所以未平歟



周易衍義卷五

欽定四庫全書

經部

周易衍義卷六

詳校官內閣學士臣尹壯圖

通政使司副使臣莫瞻菴覆勘

總校官知縣臣楊懋珩

校對官中書臣王家賓

謄錄監生臣徐錫福


欽定四庫全書

周易卷六

元 胡震 撰





震上



噬嗑利用獄彖曰頤中有物曰噬嗑噬嗑而亨剛柔

分動而明雷電合而章柔得中而上行雖不當位利

用獄也



制萬者天下之大害噬嗑者治天下之大用也凡天

下萬事所以不和合人不得亨通者皆有以間之也

噬而噍之則亨通矣獄者所以審查情偽審得其情則知為間之道故欲去強梗之間又利在於用獄也用獄所以致其刑也夫天下猶一身也頤口之間有物以間之則為吾身之害天下之大有強梗以間之則為天下之害以諸侯而有背叛弑逆之間不去之則不足以通侯邦以卿大夫而有讒譖凌逼之間不去之則不足以通臣道以庶民而有盜賊姦宄之間不去之則不足以通民情然強梗之情難測也不可

無刑獄以察其為間之情是以聖人用之諸侯則有  
邦典在用之卿大夫則有邦法在用之庶民則有邦  
成在又鄉士掌國中之獄縣士掌郊野之獄方士掌  
都家之獄訝士掌四方之獄皆所以去間也或曰衣  
冠不犯所以為帝治之隆圉圉空虛所以為王道之  
懿通天下之治而以刑獄為先不亦務末而遺本乎  
曰刑獄之用非聖人之本心也使天下之人皆居仁  
由義皆志道據德皆尊君親上物我兩忘於道化之



中上下並生於天地之間豈非聖人心之至願奈何  
人生天地間習俗各別嗜欲不同小則不孝不睦不  
友不嫺不任不恤大則負固山谿猾亂華夏皆所以  
梗熙雍輯寧之治非用刑獄何以除之此明刑者之  
所以助文教之所不及也彖曰頤中有物曰噬嗑噬  
嗑而亨此以卦體釋卦名卦上下二剛爻而中柔外  
剛中虛頤口之象中虛之中有九四一爻以為之間  
頤中有物之象頤中有物而不得合必噬之而後合

故為噬嗑合之而後亨也又曰剛柔分動而明雷電  
合而章柔得中而上行雖不當位利用獄也此以  
卦德卦象卦變釋卦名也卦之三剛三柔分而不  
偏剛不至於過嚴柔不至於過寬用中之獄也震動  
離明動而无蔽情偽之洞見察獄之至也離雷震雷  
交合章明體是用獄天之道也六五以柔居剛雖不  
當位得中上行以是用獄仁之至也剛柔分明而辨也  
雷電合明而威也治獄者明以察情非矜其明威以

懲惡非尚其威一聽於六五仁厚中和之君而已此  
先王治獄之本意此卦其變為井卦其象外剛中柔  
九四一爻間之為頤口中有物噬而後嗑之象其占  
有其德則應其占也卦變自益來六四之柔上行至  
於五而得其中也

象曰雷電噬嗑先王以明罰勅法

電掣雷鳴无物不回噬嗑之象明罰使知懼罰明則  
情偽無所逃勅法使知避法勅則強弱不敢犯所以

去治教之間而使一歸於順治也明罰以離勅法以震罰者刑之薄法者刑之先先故知而不敢犯薄故懷而不忍犯金作贖刑明罰也象以典刑勅法也雖然聖人非以用獄為利者特刑期無刑爾唯曰辟以止辟爾古之令王垂刑象之法於象魏唯欲其有所見而不犯於刑也令施木鐸曰不用法者國有常刑唯欲其有所聞而不麗於刑也於此益信非噬嗑之時聖人未嘗以用獄為利也

初九屨校滅趾无咎象曰屨校滅趾不行也

初與上九為受刑之人餘四爻皆為用刑之人屨校不懲必至荷校而械其首滅趾不誠必至滅耳而獻其馘初九之小人能懲於薄刑止其惡而不行則不至貽上九惡積罪大之凶禍矣庶頑以撻而格王駱以剛而賢朝為小人暮為君子豈特无咎而已夫人之氣質不美所棄者廉恥所趨者功利非威無以使之懼非罰无以使之懲然一時之痛楚悠久之悔艾

也造化之於物榮之所以生物枯之亦所以生物雨露所以生物而雪霜亦所以生物也聖人之於民賞之所以愛之而罰之亦所以愛之也刑一加於民而能警之於无過之地豈非薄罰乃斯民之大幸歟

六二噬膚滅鼻无咎象曰噬膚滅鼻乘剛也

膚肉之嫩者鼻氣之出入者六二居中正之位而治初九之惡理直勢順其刑易服如噬膚之易入然初與九四為正應如鼻息之交相往來四乃初之黨與

為治化之梗者也九二用刑必加減鼻以絕其往來之路則无失刑之咎而為惡之勢孤矣夫罪惡易服固有刑之權而黨與必治乃所以為用刑之道春秋聖人之刑書也隱公四年衛州吁主伐鄭之兵而經書宋陳蔡以先衛人者何也所以誅絕亂賊交通之黨也桓公三年宋人有弑君之罪而經書齊陳鄭之成宋亂者何也亦所以誅絕亂賊交通之黨也夫子无位而司伐惡之筆者其書法如此則其如六

二之有位而操伐惡之勢者其刑可不正乎六二當噬嗑之任有位而得中得正以中正用刑人誰不服去間之易如噬膚然參之乾肉乾腊乾肺為有間矣然聖人不以罪之易治為喜必以絕罪惡之黨與為喜蓋以小人機謀交通貨賄交私傾險交結必有其儔與如鼻之往來也必絕其機謀貨賂傾險之路然後為无咎象曰乘剛也謂初九為剛而二乘之九四為剛而初應之六二之治初九以有位而御无位不



難能也吁季友去叔牙而不去慶父之姦卒以成魯國之禍子突拒衛朔而不禁五國之暴卒以弛周之威五王黜武氏而不去三思之佞卒以貽唐室之憂考論古今之變而三復臧鼻之言噬嗑之六二其旨深矣吳淠非楚則反不決燕旦非上官則謀不發小人有黨則惡日長也童溪曰人之罪惡固有所謂不可赦者故君子痛以待之在己不以為慘在人不以爲怨又況六二之柔乘初九之剛剛柔之濟資諸人

以為助而與衆治之豈其過歟故雖噬膚滅鼻也而  
曰无咎

六三噬腊肉遇毒小吝无咎象曰遇毒位不當也

腊肉乾而噬久藏而多毒九四為一卦之梗若腊之  
堅而難噬也六三以柔弱之材居剛決之位陰居陽位  
不能服人用刑於剛暴而反為所傷如噬乾腊堅韌  
之物而遇毒惡之味反傷於口也是可鄙吝然奉法  
以行終亦无咎夫用刑以去間功立而義立者上也

功成而義虧者下也功不足而義不失亦可以為次  
矣懲戒罪惡而罰不濫誅殛姦宄而刑不忒是噬嗑  
之得其道也有獲禽之利而有詭遇之羞有御衆之  
動而有助虐之恥此噬嗑之失其道也若夫志在遏  
惡而惡不能遏志在討罪而罪不能討雖其範我馳  
驅而无去間之失然義之不忒君子无責焉子突欲  
去衛朔而反遇四國之毒吝也然志在輔正於義何  
咎李固欲去漢姦而反遭羣小之毒吝也然志在去

姦於義何咎葛亮欲殄漢賊而反遭街亭之毒吝也  
然志在殄賊於義何咎伯禹徂征尚或以逆命聞周  
公東征尚或以破斧聞一時之屈仲聖賢猶有所值  
况六三以至柔之質遇難治之惡又居多凶之地則  
遇毒何足咎乎象曰位不當也謂以柔居剛所處之  
地不足以服人是以遇毒然勢不足以去間其功有  
愧而其義无愧也是以小吝而无咎焉故論之君子  
有殺身以成仁无求生以害仁華督有大逆之罪孔

父義形於色而亦遇毒春秋亦褒之蓋生亦我所欲  
義亦我所欲舍生而取義者也是以君子處噬嗑之  
世不憂其遇毒而憂其有咎楊氏曰欲去惡者可使  
才不稱位乎百揆非舜則去四凶以安民祇以害民  
司寇非仲尼則誅少正卯以治魯祇以亂魯小吝而  
无咎者能度其才而噬暴者庶乎吝而不咎矣

九四噬乾肺得金矢利艱貞吉象曰利艱貞吉未光也  
乾肺肉之有聯骨者金取剛矢取直此一爻取二義

一取其剛惡中間之象又取其不中不正之象雖指  
為乾豚之間可也一取其剛善近君之象取其金剛  
矢直之象雖謂其當噬嗑之任可也以剛之惡言則  
為大間之人以剛之善言是為去間之人九四居近  
君之位當噬嗑之任四已過中其間愈大而用刑愈  
深也如噬至堅有骨之物乾肉而至堅艱噬者也非  
得剛直之道以去之不可九四陽德剛直可以去間  
然陽而居柔剛明則傷於果居柔則守不固又利在

於克艱其事而貞固其守則吉也夫去強梗之間莫  
宜於剛直用剛直之道尤宜於敬謹好剛而不艱貞  
其蔽也狂好直而不艱貞其蔽也絞故望之欲去石  
顯非不剛直而身以石顯死王章欲去王鳳非不剛  
直而身以王鳳誅則所以用吾之剛行吾之直又可  
忽乎權姦之玩弄神器君臣之大間也汚民塗毒生  
民君民之大間也外夷之隔絕王化內外之大間也  
是三者必得金矢剛直之道然後可以合君臣上下

內外之交然剛直固可濟也又在利於艱貞戒謹乎其所  
不覩恐懼乎其所不聞防患也必周謀事也必審如是則  
可以遂其剛直之志象曰未光也以天下有姦凶之當噬  
是道之猶未光顯不可以不艱貞也或曰九四自為梗而  
曰噬乾肺噬之者誰也曰以九四剛直之大臣噬九四強  
梗之大臣也居大臣之位而近君者非一人舜與共驩雍  
處堯朝周公與管蔡並居周位以舜周公之剛直而去共  
驩管蔡之強梗故得金矢以鑽乾肺則骨可去而肉可噬



得剛直以去強梗則惡者去而治可通剛惡者為乾肺剛  
善者為金矢然猶曰艱貞吉去惡實難非正固則必敗於  
怯漏於踈然有強梗者天下之不幸去強梗者聖人之不  
得已故曰未光也又曰古者以兩造禁民訟入束矢於朝  
不直入其天所以懲不直也以兩劑禁民獄入鈞金三日  
乃致於朝不信則入其金所以懲不信也

六五噬乾肉得黃金貞厲无咎象曰貞厲无咎得當也

原闕



離下  
艮上

賁亨小利有攸往彖曰賁亨柔來而文剛故亨分剛上而文柔故小利有攸往天文也文明以止人文也觀乎天文以察時變觀乎人文以化成天下

陽剛而无柔以文之則獨陽不生不能成其大陰柔而无剛以文之則獨陰不成不能成其小夫乾為陽剛得坤陰以承之則能廣其始物之功日為陽剛有月陰以終之則能延其晷晷之光造化之間其剛所以亨者

柔來文之也君為臣綱陽剛之屬也必羣臣相繼  
始足以致天下之治夫為妻綱陽剛之屬也必內  
助相成始足以成一家之慶人倫之際所以亨者柔  
來文剛也今夫坤為陰柔而无成固不可並夫乾  
之大生亦必承乾之施然後有終焉月為陰柔而  
无光固不可配夫日之明亦必借日之光然後能  
晝夜焉則造化之間柔之所以小利有攸往者剛  
來文之也臣綱在君柔順而不敢專命固不能運

大權矣然必天其君而後能行臣職焉妻綱在夫  
柔順而无攸遂固不足與大政矣然必天其夫而  
後能行婦道焉是人倫之際柔之所以小利有攸  
往者剛來文之也剛之與柔以分言之則有尊卑  
以位言之則有貴賤以德言之則有健順分雖不  
同而理則相須此一不獨立二則為文也彖曰賁  
亨柔來而文剛故亨分剛上而文柔故小利有攸  
往天文也文明之止人文也觀乎天文以察時變

觀乎人文以化成天下此以卦變言卦自損來者  
柔自三來而文剛自既濟來者柔自上來而文五  
此剛得柔之助而亨也卦自損來者剛自上而文  
三自既濟來者剛自五而文上此柔得剛之助而  
小利有攸往也剛柔交相錯即卦體可以觀天之  
文文明以止艮為止離為明即卦德可以觀人之文  
天文之著者三辰五行之象觀之可以察四時之變  
人文之著者三綱五常之典觀之可以成天下之化

柔來文剛其質本剛故亨剛上文柔其質本柔故所  
利者小吾觀唐虞之際唐堯命羲和而正天文日中  
星鳥知其為仲春日永星火知其為仲夏宵中星虛  
知其為仲秋日短星昴知其為仲冬在璇璣玉衡以  
齊七政置歷象以授人時則觀天文而察時變者在  
是敷五典而五典從制禮樂以合天地之化至於協  
和萬邦黎民於變時雍則觀人文而化成天下者在  
是故曰重華曰文明後世語貴文之盛舍唐虞其誰

與其卦其變為困卦其象火明山下有賁飾之象其  
占則小利有攸往也

象曰山下有火賁君子以明庶政无敢折獄

山止於上火明於山下有火明有所止之象又火  
在山下而照庶類皆被其光明為賁飾之象君子體  
離明之象而昭明庶政則大綱小紀秩然有序本數  
末度昭然曉示而文明之治達諸天下體艮止之象  
而无敢折獄则无敢有折獄之心明不肆用情實不

沒使民无訟好生之意常達於天下明庶政養民之心急也无敢折獄害民之心輕也洪氏曰政事尚顯設文以飾治可也獄事尚貞實飾辭以文致不可也前乎噬嗑強梗當去則以用獄為利時乎責治文教既明則以折獄為後此又時措之宜也

初九責其趾舍車而徒象曰舍車而徒義弗乘也

君子斯文之所在達則振斯文以飾天下窮則卷斯文以飾一身初九以剛正之資秉文明之德而在无



位之地斯文其廢乎亦還以飾天下者飾一身而已  
責其趾飾其身之所行也何以飾其所行唯義所在  
義在仕舍徒而車義在止舍車而徒今居責飾文明之時  
二吾近而非吾應四吾應而與吾遠遠者不得從近  
者不能從何也義也此舍車而徒行之象也太公非  
不賢而伯夷不從之以涼武王侯霸非順指而嚴光  
不從之以事光武初九責世之放民也斯世而有斯  
人非榮乎夫君子所以設飾其身在於節義之貴不

在於祿位之貴在於天爵之貴不在於人爵之貴貴  
之初九有忠信以為與有禮義以為器其出言有章其  
行有技業令聞廣譽施於身致飾於下位者自得也  
故大車檻檻不足以榮其身以義不當乘寧舍之而  
徒行也象曰義弗乘也君子取舍在於義而已如其  
義則謀王斷國亦不可以徒行也如其非義則守身  
獨善亦不可以苟取也初九之行乎貧賤豈悖義以  
為高哉若夫出車彭彭旗旒央央南仲之承王命也

四牡彭彭八鸞鏘鏘山甫之城東方也此則義之當乘而不徒責其趾也程氏曰舍二從四舍易從難如舍車而徒行守節義君子之飾責也

六二責其須象曰責其須與上興也

須隨頤而動者也六二當責飾之時居離明之位柔順中正三以陽剛得正皆无應與故二附三而動有責須之象是二有文明之德以責飾其從人之道也二之從剛而動猶須從頤而動也從剛而動必以責

言者二之從三非邪言邪說而文其徇物之過也非  
令色足恭而文其悅人之容也有仁賢以為汲引則  
從之有尊貴以為應援則從之不然子敖之從適以  
為樂正子辱彌子之主雖得衛卿祗以自污爾象曰  
與上興也六二為離之主有中正之德則其與上興  
者有所賁有離明之質則其與上興者有所賁六二  
君子其得賁道之盛歟安定曰須待也君子之道不  
可以躁進蓋上下相文之時六二以文明而麗乎下

柔順中正无私无應靜而有待物必有致飾者夫待而後應與上同興夫何咎焉不曰吉凶初无得失故也潘氏曰柔不能自奪正也不肯妄求修飾其得以須時用待文王而後興者

九三賁如濡如永貞吉象曰永貞之吉終莫之陵也

剛柔相賁相與潤色以成其文所謂賁如濡如也六二六四柔之正也九三剛之正也相比而相賁也然三與二四非正應故戒以常永貞正則吉也人必自

侮然後人侮之君子於正道无少玷瑕則誰敢侮之  
夫英華之絢麗而本根之不植則其英華不能秀也  
丹青之錯陳而素地之不先則其丹青无所施也文彩  
之相賁而正道之不常則其相賁也易至於陵慢今  
九三文飾之盛至於濡如不徒威儀容節得其宜而  
潤澤也雖言辭議論皆有潤色之文焉不徒立身行  
已得其賁而潤澤也雖應事接物皆有潤澤之文焉  
不唯施之一身得其潤澤而施之天下國家皆得其

賁而潤澤之也然有儀文之煥然者必有正理之宜則則不過也正也象曰終莫之陵也大抵有華无實人所侮也有聲无情人所侮也有濡如之文又有永貞之道則誰敢陵之子貢曰夫子之文章可得而聞也夫子之言性與天道不可得而聞也其所以為文章者是亦性與天道之發爾孰謂文可以滅其質乎三居文明之位為二陰所濡非正固則移其質凶之道也正固則二陰孰能陵之楊氏曰賁如自飾也濡

如待物而後飾者也待人而飾易為人所犯必得永貞則吉

六四賁如皤如白馬翰如匪寇婚媾象曰六四當位疑也匪寇婚媾終无尤也

四與初為正應相賁者也而為九三所隔不獲相賁而皤如皤白也未獲賁也馬在下而動者也初以正應而居正白馬之象也其初四求應之至如馬之翰飛而至也使六四匪為九三寇讎之所隔則婚媾遂



其相親矣夫一不獨立二則為文應與之相接而邪  
妄之可間者勢之變也邪妄之既去而應與之必合  
者理之常也賁六四與初為應而相賁者也賁以皤  
言馬以白言是為三所隔未獲相賁也然道義之交  
莫如初九三則妄求者也應與之正莫如初九三則  
枉道者也雖四為三所間而其從正從剛之志殆如  
馬之翰如也貞妄不兩立有時而妄去則貞者合賢  
與不肖不兩盛有時賢者親則不肖者踈矣六四與

初九以正道而相責九三何終能間之哉象曰六四當位疑也謂正應在初而三間之是所當之位為可疑懼此所以從初之志如飛翰也又曰匪寇婚媾終无尤也謂九三不能為寇而終獲相親亦无尤也白雲曰責雖剛柔相文然陽道常饒故足以兼人陰道常乏故有以受飾之理四雖自飾亦有皤如之質將受物文飾猶六二之須丘園之責皆已待物之象也初九以剛強之才飾其趾而來翰如之馬也馬之來

所以飾四之皤四亦以飾馬之白皆有受飾之質而相文此其所以為賁也凡剛自內進人必疑之蓋力不足而居上當懼人之寇已也初以剛下柔而來應匪寇也婚媾之道也六四雖多懼疑終何尤哉朱子曰馬人所乘人白則馬亦白賁如皤如其質可受初九之賁白馬翰如其志欲從初之急也

六五賁于丘園束帛戔戔吝終吉象曰六五之吉有喜也

旌賢以隆賁之禮故得賢以成賁之功六五之君得  
文明以止之德兼羣賢藻飾之業不以列於朝著佩  
玉鳴珂者為已足又加賁于岩谷握瑜懷瑾之儒厚  
意之將有筐篚焉委積之貌有玄纁焉吝於非其人  
施之於惟其人則賢才之來上而賁君則光昭君德  
啟沃王心一人之吉也次而賁國家則潤色皇猷黼  
黻政化國家之吉也大而賁天下則宣明禮樂發揮  
綱常天下之吉也象曰有喜也謂其加禮賢臣轉吝

為吉故其可憂者祇可喜也貴于丘園乃所以飾天下國家非特飾丘園窮士而已束帛戔戔馬氏曰戔戔委積貌許慎以戔從二戈非謂有須不一之意四方聘賢前後相望於道如有次非一所也程氏曰束帛喻六五本質戔戔受人裁製而成六五陰柔之質密於上九陽剛之賢受責於上九者也丘園在外而近且高者指上九也六五柔弱不能自為為可吝少然能從於人受其製裁成責之功終獲其吉享其吉

美是可喜也

上九白賁无咎象曰白賁无咎上得志也

白者質素而无色也上九賁飾之極則失於華偽失其本貞唯能質白其賁則无過失之咎曰上得志也在上而文柔成賁之功六五之君又受其賁故雖居无位之地而實施尸賁之功為得志也既在上得志處賁之極將有華偽失真之咎故戒以質素则无咎矣質勝文固不可文勝質亦不可宮室而文勝質則

為瑤臺瓊室飲食而文勝質則為酒池肉林衣服而文勝質則為侈衣麗服大圭不琢不必雕刻以為文大羹不和不必八珍以為文大路越席不必金玉之飾也犧樽疏布不必綺縠也以質素為飾而不以華美為飾此白賁之所以无咎然上九之白賁非曰儉不中禮也責極而本之以質乃所以為文質之中也象曰上得志也敦本尚實中道不失可以得其志願也使華而失實則流弊之極必有欲為而不遂其心

者矣朱子曰貴極反本復於无色善補過矣





䷖ 坤下  
艮上

剥不利有攸往彖曰剥剥也柔變剛也不利有攸往小人長也順而止之觀象也君子尚消息盈虛天行也

剥落也羣陰長盛消剥一陽之時衆小人剥君子故君子不利有攸往夫君子小人不能兩立蕭艾之盛蘭芷之衰也稂莠之繁嘉穀之害也君子之出處非他也曰時行則行時止則止可以行而不行則為潔身亂倫為懷寶迷邦為不知通塞可止而不止則為貪

榮慕祿為枉道從人為行險僥倖當行而止非也當止而行亦非也今剥之時五陰羣然而進一陽惛然而立羣枉害正此其時也不肖妨賢此其時也此正君子儉德避難危行言遜之時艱貞晦明藏器待時之日不然危邦而入亂邦而居是自禍其身也昔者有惡來以剥君子故微子可以去商有季氏以剥君子故閔子可以汶上時之剥也君子焉可出乎彖曰剥剥也柔變剛也此以卦體釋卦名也一柔生於建

午之月而柔變一剛二柔生于建未之月而柔變二剛至  
於建戌之月則柔變五剛陽剛為陰柔所變是君子  
為小人所剝此卦之所以為剝也曰不利有攸往小  
人長也此以卦體釋卦辭也五陰長而剝一陽即小  
人長而剝君子所以不利有攸往也曰順而正之觀  
象也此以卦德發之也內坤為順外艮為止觀卦之  
象順理而止所以不往也又曰君子尚消息盈虛天  
行也此又因卦辭而申之也天行之理有消長有息

長有盈滿有虛損相為循環順之則吉逆之則凶隨時敦尚其行以天君子所以不往莫非循天理之當然也楊氏曰坤順艮止止亂以順止小人亦以順故辭黨禍者陳寔之臨延唐祚者方慶之對此順而止之非逆而激之也此君子治剝之道然聖人亦豈忍天下之久剝乎五陽消矣消極必息五陰盈矣盈極必虛剝極而七日來復是以君子尚之也於是乎知有天道曉之以觀象云者欲其知天也戒之以消息

盈虛云者欲其事天也此易為君子謀如此朱氏曰  
漢唐之季小人道長諸賢不能順而止之悉力以抗  
小人是以无成功王弼謂強亢激拂觸忤以隕身既  
傾焉功又不就非君子之所尚也故曰順而止之觀  
象也君子尚消息盈虛天行也此卦變為夬卦其象  
五陰剥消一陽之象其占不利有攸往也

象曰山附於地剥上以厚下安宅

山剥而附於地則其下厚矣為人上者觀此象故裕

民敦本務厚其下是乃安宅不傾之道書曰民惟邦本本固邦寧洪氏曰下之人富厚而不困窮則宅乎上人若斯安閒而不傾危矣所以用剝也觀剝之象一以明順而止之象一以明厚下安宅之旨則此身安而天下安何剝之足憂

初六剝牀以足蔑貞凶象曰剝牀以足以滅下也

天下之勢若履屋上庇牀下承人中處者也害人者先壞其牀足害國者先壞其國之君子君子者人主

之股肱也非國之足乎小人之滅正道消君子剥牀  
足也王章不誅漢不亡任愷不去晉不亂正道滅而  
後凶于國者隨之故剥始于滅下其流及上夫小人  
之害正其有位者固為斯道害而无位者亦為斯道  
害楊氏以為我之說唱於下墨氏以兼愛之說唱於  
下率天下而禍仁義老莊以清虛之說唱於下率天  
下而反道敗德此剥牀之足雖自下進而蔑貞之禍  
亦自下始其曰蔑貞凶蔑无也謂消亡於正道也一



陰之生聖人已有女壯之憂履霜之懼孰謂剥之初以无位居下而忽之乎象曰以滅下也取牀足為象者以陰浸沒陽於下也曰剥之初小人方盛之時何以亦凶曰小人雖進以邪害正志欲害君子不知先自賊其本心之仁義將以暴人先有自暴之凶及其至也敗常亂俗凶于其家凶于其國凶于其天下又何吉之可言

六二剥牀以辨蔑貞凶象曰剥牀以辨未有與也

辨分別上下者牀之幹也陰漸進而上剥至於辨愈  
蔑於貞也凶益甚矣甚矣小人之害道也其心險深  
與平易者異志其趨私邪與公正者異向其習矯偽  
與真誠者殊途方其未進其患易弭其黨易除其間  
易戢及其既進其位足以勝人其黨足以勝衆其姦  
足以惑主聽以權謀而滅道德之正以邪佞而滅忠  
信之正以功利而滅仁義之正剥牀以辨豈不為正  
道之憂然小人剥君子自以為吉在己而凶在人

知其凶於己者尤重也何也君子受害特身害爾小人害正乃心禍也徒知害人之身不知自禍其心賊滅天理瀆亂綱常辱身危國其身禍亦有不免者為小人者謹毋以方進為幸象曰未有與也謂陽剛君子未有應與是以為陰柔所剥若君子有與尚可勝小人而不為其所蔑聖人於此重傷君子之孤也又曰與許也未有與者小人而剥君子衆論之所不容未有許之者也楊氏曰牀有幹國亦有幹二柔進

而變二剛此小人進為大臣而剥君子之大臣也其  
罷九齡相林甫之日也五陰一陽孤且外孰為之與  
故曰未有與也未有者聖人猶待其有也歟

六三剥之无咎象曰剥之无咎失上下也

六三處上下衆陰之中獨與上九一陽相應有輔上救  
亂之志小人之君子也在剥之時聖人許其无咎者  
觀之之辭也夫習俗之移人雖賢者不能自免而黨  
與之同流在陰柔尤難于自新今剥之六三與不賢

居而翻然有賢賢之心與不仁處而翻然有好仁之心是處衆醉之中而慕獨醒溷皆濁之中而慕獨清是為改過遷善之人是為滌瑕蕩穢之人是開徙仁遷義之門謂之无咎信乎其无咎象曰失上下也是與朋黨相失而處剥之道為无咎也求之古人墨子之夷子而求見孟子楚產之陳良而北學周公以呂強與曹操同類而有清忠奉公之節武攸緒與諸武同宗而有隱逸去之之操之人也其能處剥而无咎

者歟

六四剥牀以膚凶象曰剥牀以膚切近灾也

五為君位六四近之如剥床以膚是小人之禍切君身也君子用則足以福天下小人用則足以禍天下六四之剥陽必玩弄神器僭作威福植私黨汲引凶徒進便佞以固君寵獻邪說以惑君聽執左道以蔽君心眩惑一人之耳目昏迷一人之心志由是瀆亂紀綱紛擾刑政敗壞風俗戕賊生靈其剥喪治體有

不容殫紀者小人之亂正一至於此其切身之禍一何慘乎象曰切近災也言其剥之切近六五而有切身之禍也然則處剥之君宜何如曰監成帝之優柔而不使王莽為司馬則可以免剥膚之凶監二世之不明而不使趙高為丞相則可以免剥膚之凶不是之思而縱羣陰之剥陽則天下之禍未已也剥而至膚是避患不速見幾不早如蔓草之難圖雖欲有以正之盖无及也

六五貫魚以宮人寵无不利象曰以宮人寵終无尤也  
六五以柔居君位實為羣陰之主總羣陰以聽命如  
貫魚而聯之不使其害正調羣陰以寬恩以宮人而  
寵之不使其激變御之以嚴懷之以寬則待小人之  
道得矣周赧王受制於強諸侯而不能統僭蔑之臣  
文宗受制於家奴而不能去閹黨之姦魯昭公誅意  
如之強僭而反受其辱質帝斥梁冀之跋扈而反致  
其毒皆以御懷之不得其道也今六五之待小人其



曰貫魚陰類也小人亦陰類化魚而貫之則有操持之無縱舍之有把握之無解散之姦惡者自我而拘係之貪虐者自我而維繫之吾御小人如此其嚴故不使縱其傾險以剥陽此其所以无不利也又曰以宮人陰類也小人亦陰類也視之如嬪御而不與之以冢宰之柄視之如妾婦而不與之以威福之權賞之以金帛而不使之干預朝政懷之以恩幸而不使其有怨忿之念吾懷小人也如此其寬故不及其

反側以致剥陽此其所以无不利也象曰終无尤也  
舉宮人而不舉貫魚節文例也謂之終无尤所以見  
其无不利也此乃六五之道不失而得懷御小人之  
道歟魚陰物宮人陰之美而受制於陽者也程氏曰  
剥及君位剥之極也其凶可知故六五爻更不言剥  
而別設義以開小人遷善之門

上九碩果不食君子得輿小人剥廬象曰君子得輿民  
所載也小人剥廬終不可用也

諸陽消剥已盡獨有上九以一陽爻尚存如碩大之  
果不見食於人將有復生之理上九一變則純陰矣  
然陽无可盡之理變於上則生於下无間可容息也  
故九月為剥十月為坤謂之陽月恐疑其无陽也故  
曰陽天下亂極思治剥極思復流離蕩析之民孰不  
載君子以為安故曰君子得輿若小人處剥之極以  
邪剥正是剥其三綱五紀仁義忠信之道自去一已  
庇覆如剥其廬而无所容身於君子之下也象曰民

所載也五陰載一陽而宗之是民心之所承載也又  
曰終不可用也一陽庇五陰而反剝之是小人之終  
不可任用也君子得輿為民所載則有厚之之道小  
人之性自下窮上必剝其廬而後已楊氏曰陰極思  
治白公之亂幾危矣而國人望子高之來卒安楚者  
子高也此君子得輿之象

欽定四庫全書

卷六



震下  
坤上

復亨出入无疾朋來无咎反復其道七日來復利有攸  
往彖曰復亨剛反動而以順行是以出入无疾朋來无  
咎反復其道七日來復天行也利有攸往剛長也復其  
見天地之心乎

此陽復之卦也夫嘉會之幸逢者機也重責之當任  
者志也反之吾身而无艱厄參之同類而无否剥驗  
之天時而无蹇運此機之難濟者也利有攸往奮然

而有為銳然而有行此志之所當勉者也且君子之復何以見其亨以在己觀之向也陰盛而今也陽復向也困厄而今也通達出而顯仁无疾也入而藏用亦无疾也以朋類觀之協謀協知同心同德陳力就列惟此時為无咎官師相規惟此時為无咎以天運推之則天運之反復適當七日之期一之日為姤二之日為遁三之日為否四之日為觀五之日為剝六之日為坤至于七日而為復於辰為建子之月于律

為黃鐘陽剛之復而陰柔之消乃君子方長之數也  
反諸已則復而无疾參諸朋類則復而无咎驗諸天  
時則又當來復之運此時此際復之亨宜也不往則  
已往則必利彖曰復亨剛反動而以順行是以出入  
无疾朋來无咎此以卦德釋卦名也反歸也陽歸為  
主陰去為客故復之亨以剛之反喜之之辭也震動  
于內坤順于外剛反而動以順行之則无疾之者矣  
待朋來无咎也又曰反復其道七日來復天行也此



推文義以釋卦辭也天道之行消則息終則有始觀  
息之出入物之榮落日之朝夕月之晦朔歲之春冬  
逝者如斯不舍晝夜曷嘗頃刻而息哉故天行則自  
然反復其道七日來復也此聖人慰之之辭也曰利  
有攸往剛長也謂陽長君子之道方長而盛為臨為  
泰為大壯為夬皆自此而始之此所以宜有所往也  
剛長則萬物望生息之功君子長則天下望平治之  
福豈可止而不行故剛長利有攸往聖人勉之之辭

也又曰復其見天地之心乎動而生物是天地之心  
貴陽賤陰是天地之心長君子消小人是天地之心  
心不可見聖人觀于復而見之程氏曰一陽復于下  
乃天地生物之心先儒以靜為見天地之心不知動  
之端乃天地之心也非知道者孰能識之潘氏曰剝  
以順而止復以順而動君子處道消之極至道長之  
初未嘗一毫之不以順也朱子曰有善惡之復有動  
靜之復終日營營萬物並馳忽然有惻隱是非羞惡

之心發見此善惡為陰陽也若寂然至靜之中有一念之動此動靜為陰陽也動靜天地之復善惡人道之復彖象言動靜之復六爻言善惡之復此卦其變為垢卦其象五陰一陽在下有陽氣來復之象其占利有攸往也

象曰雷在地中復先王以至日閉關商旅不行后不省方

卦辭之主動勉君子以當行之運象辭之主靜示人

君以順天時之事雷聲之動而復於坤地之下陽氣微也先王以此日至之辰而閉關商旅不行乎道塗所以使之齋戒掩身以待陽之定也上之后王不循省四方所以齋戒掩身以待陽之定考之月令毋發蓋藏毋發室屋于以不發天地之房塗庭闕築圉圉于以助天地之閉藏至于處必掩身禁嗜慾安形性事欲靜是皆不行不省方推之也洪氏曰關動物也閉關以雷方方岳也不省方以地皆王事也閉關以

制故稱先王不省方以時巡故加后以別之

初九不遠復无祇悔元吉象曰不遠之復以修身也

改過於既形未足以為善改過於未形乃所以為善  
初九處卦之下震動之初為復之先又陽剛震體明  
於辨小勇於改過是失未遠而復之而不至於悔復  
之至早者也其改過之速而不至於悔是以謂之元  
吉善之美者也治身者冲和之少愆即醫之善道也  
逮其疾痛之甚而始欲復其氣宇則已晚矣治國者

政事之少差即修之善道也迨其亂離之亟而始欲復其典章則已晚矣君子明善而復其初其可以少緩乎故係辭釋之曰顏氏之子其殆庶幾乎有不善未嘗不知知之未嘗復行也其不遠復之義乎象曰以修身也初九反善之速所以修其身也故格物致知則能明不遠復之義而足以察修身之理誠意正心則能充不遠復之功而足以盡修身之道此其用力之勇而反之於初所以元吉也程氏曰復為反善

之義失而後有復失之不遠而復則不至于悔大善而吉也朱子曰復雖一陽之生然而與衆陰不相亂如人之善端方萌雖小而不為衆惡所遏底意思

六二休復吉象曰休復之吉以下仁也

初九乃克已復禮之仁人六二雖陰爻柔順中正上无應與密比於初能休休好善此天下之所以吉也有樂善之量斯有反善之功初九為內卦震之主震之為卦在四德為元在四時為春在四方為東在五行

為木皆足以見天地生物之心是初九固與造化同  
其仁者六二能親而下之所以為休復之吉自其人  
而言之顏氏之子有不善未嘗不知知之未嘗復行  
非禮勿視非禮勿言非禮勿聽非禮勿動皆所以克  
已復禮而為仁六二能親而下之所以為休復之吉  
象曰以下仁也休復之休即秦誓所謂休休有容之  
意孔氏以休為樂善即下人也鄭氏以休為寬容即  
下仁也何氏以休為美大美大之量亦下仁也休休



下仁以復其仁如之何而不吉也程氏以志從於陽復之休美者也

六三頻復厲无咎象曰頻復之厲義无咎也

六三以陰居陽不中不正又處動之極復而不固屢失屢復復善而屢失危道也聖人開遷善之門頻失為危屢復何咎過在失而不在復也夫不思而不得不勉而中此性焉安焉之聖人也是則无待於屢復其次有過則改而不二過有善則遷而无復不善此復

焉執焉之賢人也是以无待於屢復又其次氣質偏駁而加以以學力言之多尤悔而加以以循省則未能寡尤而常有以救其尤未能寡悔而常有以救其悔亦聖人之所許也一子路也有率爾之過有愠見之過有危而不持之過其失亦屢矣而終足為百世之師者以其聞過則喜有以復之則雖厲无咎一子夏也有西河疑民之過有哭子喪明之過有悅見紛華之過其失亦屢矣而終則以躋四科之賢以其

有過則謝有以復之雖厲无咎此六三之頻失雖聖人之所危而六三之頻復亦聖人之所予也象曰義无咎也謂其隨事復善其義為无咎也雖然君子之復未復之先自責乎反之亟已復之後尤責乎守之固不然暫復暫失物交物而引之終於必亡而已矣然則為六三者必擇善固執自强不息日新又新庶乎无頻復之厲而有反善之吉也童溪曰頻復之厲所謂困於心衡於慮而後作故曰无咎

六四中行獨復象曰中行獨復以從道也

六四居上下四陰之中而獨與初九陽剛為應與衆俱行而獨能從善然以陰居陰柔弱之極初九陽氣甚微未足以有為故不言吉與无咎聖人但稱其能獨復也甚矣特立獨行之難其人也六四之獨復豈與時高下徇物失已者乎豈悖衆以為異矯世以為高者乎六四之獨復非敢違乎衆也不敢違乎道也非徒從乎剛也不敢違乎道也道不當從不以小人

之衆而苟從道不當違不以君子之孤而輕違象曰  
以從道也味從道之一辭則四之中行獨復者夫豈  
徒哉昔者滕文公違百官族人之見而獨行孟子之  
禮陳良出楚產之區而獨悅周公之道少連出東夷  
僻陋之俗而獨知古人之學世之隨流溷波曲學阿  
世迷溺而不知反者於此可以奮然而興起矣楊氏  
曰子絕四毋意毋必毋固毋我者蓋不違在道不在  
人以六四居四陰之中獨應初九之陽以自復是所

謂失上下而從道耳自非離世絕俗之智則幾何而  
不為陰所化哉董子曰仁人者正其誼不謀其利明  
其道不計其功使六四有所為而後為之則獨復之  
誠有時而衰也其曰獨復理所當然吉凶非所論也  
六五敦復无悔象曰敦復无悔中以自考也

博厚者地之德五體坤德而得尊位大中當復之時  
遠於陽剛之應躬自厚者也故曰敦復敦復資諸已  
以為復而能自厚其德則无失之可指故曰无悔陽

復方微之時以柔居尊下復无助未能致亨吉也能  
无悔而已曰中以自考不過以中道自厚成已而已  
此中材之主也若夫下仁之復從道之復皆資諸人  
者也夫人君之復善每患于反之不篤反之不篤能  
无過乎唐太宗勉受直言非不欲復也唯其不敦於  
復是以有遼東之悔武帝欲聞大道非不欲復也唯  
其不敦於復是以有輪臺之悔六五之敦復无悔豈  
非篤志以復其初歟豈非篤信篤行篤敬以復其初

歟蓋敦復者有反善之誠也无悔者无不善之累也  
又曰不成於上而成於五得中也誠自成也反身而  
誠得固有之中也

上六迷復凶有災眚用行師終有大敗以其國君凶至  
于十年不克征象曰迷復之凶反君道也

上六以陰柔居復之終陰則暗而无睹柔則懦而无  
從昏迷而不能復者也故凶災者天灾禍自外來者也  
眚者人過禍自內來者也有灾眚則其凶非一用師




則敗而為師之凶是以其國君凶則為邦之凶至于  
十年不克征則貴而无輔高而无民盡坤土之數而  
尤不克征亦迷而不復之象也夫人之心虛靈知覺  
具衆理而應萬事上六之迷復以其本心本有是天  
理而不知復本有是良知而不知復故商受之罔有  
悛心而卒於亡國迷復之凶也周幽王之不訛爾心  
於致亂者迷復之凶也象曰反君道也謂與君道相  
背馳也然則宜如之何必如堯之克明峻德然後不

至於迷復必如太甲之顧諟天之明命然後不至於  
迷復必如成湯之日新又新然後不至於迷復楊氏  
曰上六陰柔小人之極居亢滿大臣之位遂其姦而  
不改迷於邪而不復故凶於身則天灾人眚之畢集  
凶於國則師敗君凶而不振廬杞是也害真卿沮懷  
光天下皆以為姦邪而德宗獨不覺其姦邪伐叛之  
師未反而朱泚之變已作奉天之圍未解而梁州之  
幸已嚴自是而後姑息之政行強藩之勢成至於元

和乃始克征何啻十年而已乎國君者六五也以之者上六也反君道反言違也六五之君道為上六反之也陰盛之世君道常為小人所以故曰以其國君凶徐氏曰上六位高而无下仁之美剛遠而失遷善之機厚極而有難開之蔽柔終而无改過之勇是昏迷不知復者也居上治衆當從天下之善從天下之善則改過不吝舉錯得宜天祐人助何凶之有又曰復卦陽道尚微未可進故六爻无利用之辭專明反

身之義厚養以俟亨進乃復之旨丘行可曰初為明  
睿之君子知過即改上也二四為樂善之賢者舍已  
以從人次也六五為不踐迹之善人自厚其身又其  
次也六三為改過不勇之人復而失失而復又其次  
也上六則物慾沈滯本心喪失下愚不移者也又何  
復之可言民斯為下矣

--	--	--	--	--	--	--	--



震下  
乾上

无妄元亨利貞其匪正有眚不利有攸往彖曰无妄剛  
自外來而為主於內動而健剛中而應大亨以正天之  
命也其匪正有眚不利有攸往无妄之往何之矣天命  
不祐行矣哉

无妄者實理自然之謂程子曰動以天為无妄動以  
人欲則妄矣无妄至誠天之道也天之化育生生不  
窮各正其性命无妄也人能合无妄之道則與天地

合其德矣无妄有大亨之理利貞法无妄之道利在  
貞正失正則妄也雖无邪心苟不合正理則妄乃邪  
心也故有匪正則為過眚不利有攸往也夫妄與无  
妄此天理人欲之所以別也无反无側天理也淪於  
反側者人欲也无偏无黨者天理也倚於偏黨者人  
欲也動容周旋循乎大中之矩者天理也出處語嘿  
流於不中不正之私者人欲也循天理則不求利而  
自无不利徇人欲則求利未得而害已隨之此古之

君子所以立必正方聽必正容言必正言行必正行  
割不正不食席不正不坐正己以正物誠以正道得  
則公理昭明私意泯絕成已成物无所往而不利正  
道失則勝心橫發作偽日拙喪物喪己无所往而可  
利也仁我所行也不雜以兼愛之妄則可以仁民可  
以事親不至於弊而使天下之无父義我所行也不  
雜以為我之妄則可以制事可以立敬不至於弊而  
使天下之无君行乎禮而不失之妄則以正君臣以



立父子以定典章以事宗廟何有乎務華失實之咎  
行乎智而不失之妄則以別邪正以辨是非以周萬  
物以濟萬變何有乎術數機詐之咎是妄與不妄之  
分利與不利之判觀諸正道之得失可知矣彖曰无  
妄剛自外來而為主於內以卦變釋卦名也自訟來  
者九自二來居初為卦之主動而不妄剛正為主於  
內无妄之義也動而健剛中而應大亨以正天之命  
也比以卦德卦體而釋辭也震主乎動乾主乎健動

而剛健則不屈於人欲大亨以正之本也五以剛中  
應二二以中正應五剛中而應則不累於柔邪之偏  
亦大亨以正之本也此則稟乎天命之性者也曰其  
匪正有眚不利有攸往无妄之往何之矣天命不祐  
行矣哉此因文義推卦辭之反說也无妄至正理而  
止過此以往則有過是乃邪妄之動也天命不祐尚  
可行乎哉此則悖乎天命之性者也白雲曰動而健  
者動以天不以人也止於无妄而不往則天道常存

不止於无妄而有攸往者是以人而滅天故彖之意以謂捨无妄而往者又何之矣此天命所以不祐也孟子曰盡心知性則知天存心養性以事天知事天為天所祐皆必與天合德也此命字與中庸天命之性孟子曰命也君子不謂性之義同此聖人欲人之著誠去偽而明其天也又曰在理為正在人為性在天為命一也楊氏曰堯舜之禪湯武之師禹之治水動以天也子嚙之遜苻堅之師鯨之治水動以人也

朱子曰史記作无望謂无所期望而有得焉是箇不正望底卦如人方病忽勿藥而有喜此卦其變為升卦其象雷行天下无妄動之象其占大亨而利於正也

象曰天下雷行物與无妄先王以茂對時育萬物

陰陽相薄雷行天下震發生萬物各正其性命物物與之以无妄之理而无一息之差此造化无妄之用也先王體之對時育物東作南訛之必以其序朝作

暮息之必以其天使生靈之繁各有以遂其性動植之微各有以全其生對時育物聖人无妄之用也洪氏曰天不妄雷雷不妄行物不妄與而後萬物育焉非時之雷其發為妄物不與也以己之茂對時之茂以育物之茂先王之无妄也若无伐木无覆巢无取麋卵无出罟置罔羅畢翳凡順時而布令者皆是也雷之動於仲春萬物與之而驚蟄雷之收於仲秋萬物與之而閉藏此雷之所以无妄也對時育物因其

性而不為私焉

初九无妄往吉象曰无妄之往得志也

初九以剛實變柔而為主於內中誠不妄者也當位而動是以无妄而往何所不吉夫妄與无妄每於動之中見之喜怒哀樂之未發則渾然天理之體寂然天性之貞智愚均具初无吉凶之可言喜怒哀樂之既發則有是非有公私有中有不中有妄无妄之所以分而一吉一凶之所由判今初九以无妄而往吉

者動以誠也行乎一身則言忠信行篤敬視身之吉也行乎一家則父子睦兄弟和齊家之吉也行乎鄉黨則長幼序風俗美隣里之吉也行乎一國則上下洽紀綱正輔世長民之吉也此无妄之理至誠之體也以无妄而往者至誠之用也往而得吉至誠之功也象曰得志也謂以无妄而往无不得其志也誠之於物无不能動以之修身則身正以之治事則事得其理以之臨人則人感而化无所往而不得其志也楊

氏曰雷動於初而不妄萬物一歲之盛福也聖人動  
於初而不妄萬民一世之盛福也故伊尹戒太甲以  
慎厥初召公戒成王以在厥初高宗三年不言威王  
三年不飛何耶非不動也謹於初動也是惟无動動  
則志必得矣无妄之往一辭而有二義彖辭所謂无  
妄之往謂无妄之正不可小過无妄而後有所往則  
過於正而入於妄所以有眚也象辭所謂无妄之往  
則謂日用常行舉无妄為以正道而行之則事皆无



妄所以有吉也

六二不耕穫不菑畲則利有攸往象曰不耕穫未富也  
六二柔順中正誠德渾然人偽不雜因時順理而无  
私意期望之心故有不耕穫不菑畲之象言其无所  
為於前无所冀於後自然无不利也以義言之即聖  
人之无為而治學者之不要人爵而人爵從之文正  
所謂无妄之福也夫天下之理出於自然而然者乃純乎  
天理而不雜以人偽者也道非求尊也得其道則道

自尊德非求貴也得其德則德自貴仁非求榮也得其仁則仁自榮六二之不耕穫不菑畬者盖利之獲必耕於春為其始也穫於秋期於終也至誠无欲则无所為亦无所期也菑於一歲為於始也畬於三歲期於終也至无欲则无所為亦无所期也始終一致意必兩忘順理應物焉往而不利象曰未富也謂不耕不穫不菑不畬其心未嘗在於求富也此時此意不識不知之時无思无為之時靜虛動直純一无偽

之時以此真心而達諸功用則位天地育萬物无不宜者尚何行而不利乎子思所謂不動而變无為而成即此理也程氏曰不耕而獲不菑而畲謂不首造其事因其事理所當然也

六三无妄之災或繫之牛行人之得邑人之災象曰行人得牛邑人災也

六三柔不當位也多凶之地所謂匪正者也故有災然其災出於意料之外或係之牛行人有盜牛之得

而邑人受失牛之災則其災豈不以妄而致乎夫无妄而獲福有妄而致禍此理之常也有妄而幸免无妄而多艱此時之變也自其常而言之舜德罔愆則天申命用休苗民不恭則天必加罰禹德克勤則歷數歸桀德既昏則宗社亡此福禍无不自已求之者由其變而觀之以原憲而貧以季氏而富以顏子而天盜跖而壽其禍福又有不自已致之者天道福善而禍淫善者有時而不得福鬼神禍盈而福謙謙者

有時而或罹禍或出於氣數之適然或出於時勢之適致无妄之災吾於六三何尤焉嘗觀自古无妄之災有如六三類者不知其幾人也鄭忽君國本以嫡長而繼先君非以妄而竊國也而子突乃以庶孽歸鄭入櫟以篡竊社稷鄭突得歸而鄭忽有失國之災此猶行人得牛而邑人有失牛之災也譚子在春秋之世未有大妄以危邦也齊桓恃其甲兵之權以滅其國至使春秋書子以見其無罪之由是桓公得地

而譚子有失地之災此猶行人得牛而邑人有失牛之災也無虧有齊本以長嗣而先五子非以妄而篡位也而宋曹衛邾乃奉少而奪長于虧之戰無虧敗績是孝公得位而無虧有失位之災此猶行人得牛而邑人有失牛之災也此所以為无妄之災也聖人於此見其可憫而不見其可貶也象曰邑人災也亦惟申文辭以見其義耳雖然君子之无妄吾事之當然也一時之有災外物之適然也以不虞之禍而自己

其不妄之誠非君子之道也夏臺之囚天心之享窮  
通變於前而湯之心未嘗變也狄人之避高山之荒  
屈伸變於前而太王之心未嘗變也金石之歌手足  
之啟死生變於前而曾子之心未嘗變也君子唯當  
憂吾心之未能无妄不憂吾身之未能无災也程氏  
曰人之妄動由有欲也妄得之福災亦隨之妄得之  
得失亦稱之如或繫得牛行人得之以為有得邑人  
失牛乃是災也借使邑人繫得馬則行人失馬乃是

災也有得則有失不足為得也人能知此則不為妄動矣  
行人邑人但言有得則有失非以為彼此也

九四可貞无咎象曰可貞无咎固有之也

九四陽剛乾體下无應與剛而无私无妄者也貞固守此  
自无咎也有固守之誠則終无妄為之過无妄之道必慎  
終如始然後能无過必攸久无疆然後能无過必立不易方  
然後能无過或昏於物慾或流於習俗或撓於事變者不能  
无妄也九四之可貞无咎盖不特守之於頃刻之間而必



守之於悠久之際也子曰人皆曰予智驅而納諸罟獲  
陷穽之中而莫之避也此以見人之鮮能无妄也又曰  
人皆曰予知擇乎中庸而不能守也此以見人之鮮能无  
息也无妄而无息其四之可貞而无咎象曰固有之也  
謂其固守此无妄之道则无咎也童溪曰是正也非外鑠  
我者也我固有之也因其固有而不失之此易之所  
予也楊氏曰此回之擇乎中庸而不失所以異於不  
能期月守者也潘氏曰居大臣之位有事則可正之

職之當然何咎之有委之不為是失職也烏得无妄  
五勿藥而四可貞君无為而臣有為也

九五无妄之疾勿藥有喜象曰无妄之藥不可試也

九五剛乾中正以居尊位下應六二柔順中正之臣  
无妄之至也如是而有疾此是不期而有但聽其自  
疾爾久而自定所以勿藥有喜而无疾也有有妄之疾  
有无望之疾節宣不時嗜慾不遏飲食不節寒暑不  
避思慮不致如是而疾者有妄之疾也不治則死耳

起居有常酒色不親耳目聰明血氣和平如是而偶疾无妄之疾也治者亦死耳昔帝堯在上九年之水亦得以病堯是无妄之疾也在帝堯无妄治之勞而皇天眷命其憂易失此无妄之疾勿藥有喜也帝舜在上三苗之梗猶得以病舜是无妄之疾也在帝舜无妄治之勞而苗民格命其憂遽亡此无妄之疾勿藥有喜也象曰不可試也謂及无妄復用藥以治之是反為妄矣不可試謂不可少嘗也雖然此以无妄

之世而言之也若夫君非无妄之君時非无妄之時  
國政病於顛錯風俗病於澆漓民生病於彫困則夫  
察國脉於隱微植治體於正大又醫國者所當察也  
潘氏曰以天德居天位動合天理夫何為哉恭己正  
南面而已矣雖有小小不順久之自化不必治也疾  
猶勿藥况无疾乎


上九无妄行有眚无攸利象曰无妄之行窮之災也

上九居卦之終无妄之極者也極而復行過於理也

過於理則妄矣故上九而行則有過眚而无所利矣  
上九非有妄者也但以其窮極而不可行爾天下之  
理已至而復過則天下之事有失而无得也塗人欲  
趨邦畿之地至邦畿而止至邦畿而復往則遠邦畿  
之地而迷其塗矣黃鳥欲趨丘隅之地至丘隅而止  
至丘隅而復往則離丘隅之地而失其所安矣行无妄  
之道至无妄之極而止至其極而復行焉則過於无  
妄之極而妄動之災矣為人君止於仁過此以往則

仁或流於姑息之害為人臣止於敬過此以往則敬  
或陷於阿諛為人子止於孝過之者或有從令陷父  
之愆為人父止於慈過之者或有溺愛敗子之愆與  
國人交止於信過之者或有尾生喪身之禍此无妄  
之行所以有眚而无攸利也千鈞之重加之銖兩而  
移十丈之引加之分毫而差極至之理加之一毫而  
過此无妄之行所以有眚而无攸利歟象曰窮之災  
也謂无妄既極而復加進則反入於妄至於窮極而

災也楊氏曰居无妄之下則貴進而動处无妄之極則貴靜而止上九居无妄之極復欲動而有行其唐太宗高麗之師明皇雲南之師歟



周易行義卷六